

Gschätzti Dame ond Herre  
Liebi Mitbürgerinne ond Mitbürger

D Kultur und Sportkommissiion het das Johr für d 1. August-Red als Abwechslig mol e jungi Person welle engagiere. Trotzdem, si sie sech chli unsicher gsi, öb das äch e gueti Idee isch.

Drum hei si e Kompromiss gmacht; statt en alte Redner mit Glatze, hei sie öpper jungs mit Glatze gno.

De Uftrag isch gsi: «Was het die jungi Generation zum Thema Heimat z'säge».

Das Thema hani sither i mim Kollegekreis heiss diskutiert. Was debii usecho isch, verzelli üch jetz ide nächste 10 Minute.

Mini Heimat isch Neuendorf. Mini Chindheit isch unbeschwert gsi; keini Chriege, kei Hunger. E wunderbare Schulzeit, immene tolle neue Schulhuus, viel Abendtur, ufem sichere Schuelweg, spiele im Dorf, schlittele uf d em Beni-Hoger, Chriesi-stibitze uf em Wendelin, Minigolf spiele und in de Chäsi gängerle.

Das isch Heimat gsi.

Die wunderbari Chindheit verdanki üch, liebi Neuedörfer und Neuedörferinne. Eg verdankes dere Gmeinschaft.

Dir heit defür gsorget, dass sich üses Dorf so entwickelt het und dasses lebt.

Generatione vor mir hei investiert id Zuekunft. Dir sit innovativ und gschaffig gse und heit d Infrastruktur usbaut und Möglicheite gschaffet.

Spöter woni i de Lehr gse bi, hani mi wiiter dörfe enfalte. I ha chönne mini Bedürfniss noch, e Lehr uswähle, wo mine vorliebe entsproche het. I ha dörfe e Bruef lehre, und mi Horizont isch gwachse.

Zu dere Ziit isch au mini Heimat gwachse: Olte.... het jetzt au derzu ghört.

Nach de Lehrzit isch's Militär cho. Thun isch zwar sehr schön gsi. Nichts tun... wär schöner gsi...aber na ja. Nei, im ernscht i bi gärn is Militär. D'gmeinschaft wird dort sehr gross gschriebe. Und usserdem hät's Mami gseit, dass es mi zum Ma gmacht het.

Naja u mini Heimat isch grösser u grösser worde ... mit jedem neue Kamerad, mit jedem neue Isatzort. Üsi Schwiz isch chli, chli aber OHO. D'Landschaft isch sehr vielfältig ond d'Mönsche au ! ...pour les Romands, c'est la même chose...

Au das hani im Militär g'lernt. Zur Heimat ghöre au d'Romands u d'Tessiner.

Was üs verbindet si üsi Wert. Fleiss und Gemeinschaft si üs wichtig.

Wenn's nötig isch chöi mir eigeni Interesse bi Site loh um kollektivi oder wirtschaftliche Ziil z'verfolge.

Wie zum Biispiel bim Abstimmigs-Nei zu 5 Woche Ferie. Dir merket: das het mi möge... Wär gärn e chli länger id Ferie gange. Aber es isch au immer wieder schön hei z'cho. Hei z'cho id Heimat.

...e Heimat z'ha isch nid selbstverständlich wie ig erlebt ha I mim Isatz mit de Swiss-Coy im Kosovo ond anderne Länder. Ig ha Lüt ohni Heimat, ohni Sicherheit kenne glernt. Doch jede Mensch söt en Ort ha, woner Heimat nennt. En Ort ha, woner sicher isch. En Ort ha mitere Infrastruktur, en Ort zum wachse ond gedeihe. Das isch eis vo de Beweggründ gsi für mich, mich i de Friedenstruppe vo de Schwiizer Armee z'engagiere. Jo, mir Schwizer engagiere üs für d'Gmeinschaft, für die Geschwächte ond das isch guet.

Mis Engagement im Usland hät mir vor Auge geführt, wie glücklich eg bi, sone wunderbari Heimat z ha, wie dankbar eg dafür cha si.

Eg be mine Vorfahre dankbar, eg be üch dankbar, mini Dame und Herre. Dir wo sich für üsi Gmeinschaft engagiert hei und mir all das ermöglicht hei. Dir heit mi prägt. Üsi Gmeinschaft het mi zu dem Mensch lo wachse woni hüt bi... ond e be doch ziemlich hoch gwachse! u jetzt wetti au zruigg geh. Mit minere Arbeit, mit mim freiwilligem Engagement, mit mine Idee'e und Bescheidenheit. So wie mir Schwizer halt si...

Mir Schwiizer si es **gschaffigs Völkli**, mir lehned d Ferieinitiative ab, und bim Arzt isch üsi einzig Frog «Wenn darfi wieder go schaffe?». Tatsächlich hei mer die tüüfschti Anzahl Krankheitstäg im europäische Vergliich. ...und das obwohl üs die Welsche chli abezieh i dere Statistik.

Mir Schwiizer **engagiere üs für d Gmeinschaft**. Mir spende wie verruckt: Mir spende im Vergliich zu eüsne europäische Nochbere am meiste, fascht 2 Milliarde Franke pro Jahr ...und das obwohl d Welsche lut dere Statistik, zimmi knausrig si.

Für d Gmeinschaft leichte mir au ehreamtliche Arbeit zum Bispiel im Samariterverein, i politische Kommissionen oder ide Fүүrwehr.

Für die Red hani jetz viel Statistike müesse studiere. Und öppis chani üch au no säge: Mir Schwiizer si s **innovativste Volk in ganz Europa**.

Ide Schwiiz si letzt Johr pro 1 Million Ihwohner 1000 Patent ahgmolde worde, meh als doppelt so viel wie i andere Länder. Au jungi Lüt mit neue, fräche Idee hei gueti Chance ide Schwiiz. Jede Tag wird es neus Startup gründet. Für die ältere untere euch: Es Startup isch e Firma mitere innovative Gschäftsidee, miteme hohe Wachstumpotenzial.

Mir si gschaffig, engagiert und innovativ. Hätti kei Statische glese, würdi jetz no meine, dass das Klischees si. ....

Und so simmer mit minere Kollege zum Schluss cho, dass mir Schwiizer, zimmlig geile Sieche si. ....

Aber wöu mir au so bescheide si, säge mir das niemerem. ....

Mir fiire hüt üse Nationalfiirtag, freudig und bescheide. Ohni Militärparade, ohne Prunk wie ide Nachbarländer. Nid nur ide Hauptstadt in Bern gits es Fäscht, sondern i jedem no so chline Dörfli. Tuusigi vo Fäschte glichziitig, überall und unter de mitwirkig vo allne.

Mir fiire ide Gmeinschaft, wie do nebe de Turnhalle unter de Blache. Mir bruche nur es Glas Wi und d Nationalhymne. Ig hoffe dir singet nacher no schön....

Mir si treit vo gemeinsame Wille, vo de Gemeinschaft. So wie Anno dazumal, wo sich drüü im bescheidene Rahme troffe hei, um sich z schwöre, d' Gmeinschaft z' beschütze und d' Eigständigkeit höch z'halte.

Mir dörfe dankbar si für dä Schwur. Und dankbar für das Land und die Gsellschaft, wo üs, üsi Vorfahre hinterloh hei.

Patriotismus isch in erster Linie d' Anerkennig und Würdigung vo üsne Vorfahre.

Durch d' Arbeit, s' Engagement und d' Innovation vo üsne Vorfahre, isch d' Schwiiz vom Armehuus zum wohlhabendste Land in Europa worde.

Und mit wohlhabend meini nid nur de finanzielli Aspekt, sonder au d' Werte. Mir hei e Demokratie wo weltwiit einzigartig isch, mir hei es genials Sozialsystem und es usgriifts Gsundheitswese.

Bi üs mues niemer es ganzes Johr ufne Untersuechig bim Spezialist warte, und nachm Schlegli gohts nid 6 Mönat bis me zum Physio cha goh. I viele europäische Länder isch das e so....

Mir hei es super Land wo mir druf döffe Stolz si. Und das mues trotz aller Bescheideheit au mol gseit werde, mindestens am 1. August.

Mini Red isch nid politisch prägt gsi. Ig ha nid welle d'Wirtschaft lobe oder ökologischi Schwarzbilder mole.

Mini Message isch:

„sei Schwizer mit Leib u Seele. Stolz uf üse Heimat und dankbar“.

700 Hundert Jahr bevor eg uf d'Welt cho bi, hei die erschte Eidgnose en Eid abgleit. En Eid wo üs alli prägt het. En Eid für dä mir dankbar si.

Also was hei mir, i mim Kollegechreis vo junge Schwizer, so heiss diskutiert, siit d'Afrop für die 1. Auguscht Red cho isch? Zu welem Schluss si mir cho, usser dass mir stolz u dankbar si uf üsi Heimat, uf d' Gmeinschaft in dere mir lebe?

Mir, üsi Generation, muss hüt e witere Eid ablege:  
Mir wei üs engagiere u hert schaffe, üsi Demokratie ond Gemeinschaft pflege.  
Mir wei ganz entschiede und konsequent, üsi Errungeschafte, Werte ond Interesse verteidige.  
Mir wei für das istoh was d Schwiiz usmacht.

Mir wei dass d'Schwiiz, üsi Heimat, au ide Zuekunft, das wunderbare Stück Erde bliibt was es hüt isch.

Mir wei dass irgendwann ide Zuekunft, irgendwann i hundert Johr, e glatzköpfige Jungendliche i sinere 1.Auguscht Red i Neuendorf seit:

„Mir si stolz uf üsi Vorfahre, mir danke für das was sie gschaffe und das was sie bewahrt hei „

Geschätzti Dame und Herre, ig wünsche Euch no e wunderschöne, fröhleche 1. Auguscht!

Mathias Heim  
1.August 2019